

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 486518 25 St
Datum: 15.04.2026. godine

Općinski sud u Tuzli, stečajni sudija Vedran Milašinović, u postupku predhodnog ispitivanja prijedloga za otvaranje stečajnog postupka nad dužnikom „PROGETTI BOSNIA“ društvo sa ograničenom odgovornošću Tuzla, u stečaju, ul. Proleterskih brigada br. 60, Lipnica, sa podružnicom „PROGETTI BOSNIA“ društvo sa ograničenom odgovornošću Tuzla-Podružnica broj 1 Gračanica, ul. Ograđenica b.b., Lukavica, dana 15.04.2026. godine donio je slijedeće,

RJEŠENJE

- I OTVARA SE stečajni postupak nad imovinom dužnika „PROGETTI BOSNIA“ društvo sa ograničenom odgovornošću Tuzla, u stečaju, ul. Proleterskih brigada br. 60, Lipnica, sa podružnicom „PROGETTI BOSNIA“ društvo sa ograničenom odgovornošću Tuzla-Podružnica broj 1 Gračanica, ul. Ograđenica b.b., Lukavica, matični broj subjekta; 32-01-0161-16, JIB; 4210247590004, broj žiro računa 1995060049406623 kod Sparkasse Bank d.d. BiH.
- II Stečajni postupak se otvara sa danom 15.04.2026. godine u 14,00 sati, kada se rješenje o otvaranju stečajnog postupka ističe na Oglasnoj tabli suda.
Oglas o otvaranju stečajnog postupka objaviće se u „Službenim novinama FBiH“.
- III Za stečajnog upravnika imenuje se Osman Šećerović iz Tuzle, ul. Franje Markovića broj 8.
- IV Pozivaju se povjerioci da u roku od 30 dana, od dana objavljivanja oglasa o otvaranju stečajnog postupka u „Službenim novinama F BiH“ prijave svoja potraživanja stečajnom sudu dostavom prijave i priloga u dva primjerka u skladu sa odredbama Zakona o stečajnom postupku o prijavi potraživanja (član 110. Zakona), te prilože dokaz o uplaćenju sudskoj taksi na prijavu potraživanja u iznosu od 1% od vrijednosti potraživanja, s tim da taksa ne može biti manja od 50,00 KM, niti veća od 10.000,00 KM, na žiro račun broj: 1321000256000080 – Vrsta prihoda: 722221 Budžet Tuzlanskog kantona.
- V Pozivaju se povjerioci da u roku od 30 dana, od dana objavljivanja oglasa o otvaranju stečajnog postupka u „Službenom novinama F BiH“, stečajnog upravnika obavijeste koja prava osiguranja potražuju na predmetima imovine stečajnog dužnika. Potrebno je navesti predmet na kome se potražuje pravo osiguranja, vrstu i razlog nastanka prava osiguranja kao i osigurano potraživanje.
- VI Pozivaju se lica koja imaju obaveze prema stečajnom dužniku da ih bez odlaganja izvrše.
- VII Otvaranje stečajnog postupka ima se upisati u Registar poslovnih subjekata Općinskog suda u Tuzli, zk ured Općinskog suda u Tuzli, Službe za geodetske i imovinsko-pravne poslove Grada Tuzla.
- VIII Skupština povjerilaca (ispitno ročište) na kom će se ispitati prijavljena potraživanja zakazuje se za dan 02.06.2026. godine u 13.00 sati, u zgradi Općinskog suda u Tuzli, ul. ZAVNOBIH-a bb, sudnica S4-prizemlje.

- IX Skupština povjerenika (izvještajno ročište) na kome će se na osnovu izvještaja stečajnog upravnika odlučiti o daljem toku stečajnog postupka održat će se istog dana nakon ročišta za ispitivanje prijava potraživanja.

Obrazloženje

„PROGETTI BOSNIA“ društvo sa ograničenom odgovornošću Tuzla, ul. Proleterskih brigada br. 60, Lipnica, sa podružnicom „PROGETTI BOSNIA“ društvo sa ograničenom odgovornošću Tuzla-Podružnica broj 1 Gračanica, ul. Ograđenica b.b., Lukavica, kao dužnik, podnio je dana 06.05.2025. godine ovom sudu prijedlog za otvaranje stečajnog postupka nad ovim pravnim licem, zbog platežne nesposobnosti stečajnog dužnika, temeljem odredbe člana 4 i člana 6 Zakona o stečaju („Sl. novine FBiH“, broj 53/2021).

Nakon razmatranja prijedloga sud je rješenjem od 30.07.2025. godine pokrenuo prethodni postupak radi utvrđivanja uslova za otvaranje stečajnog postupka i imenovao privremenog stečajnog upravnika temeljem odredbe člana 60, 61 i 63 Zakona o stečaju.

Privremeni stečajni upravnik u spis suda dostavio je izvještaj o provedenom prethodnom postupku sa nalazom i mišljenjem na okolnosti postojanja razloga za otvaranje stečajnog postupka. Temeljem član 102 stav 1 Zakona o stečaju zakazano je ročište radi ispitivanja uslova za otvaranje stečajnog postupka i rasprave o izvještaju privremenog stečajnog upravnika.

U izvještaju i na ročištu privremeni stečajni upravnik Emir Nuhanović je naveo da je privredno društvo obavljalo djelatnost zbog koje je i osnovano u iznajmljenim prostorijama na adresama ul. Proleterskih brigada br. 60, Lipnica, Tuzla i ul. Ograđenica b. b. Lukavica. Gračanica. Društvo od februara 2024. godine ne obavlja poslovnu djelatnost, niti ima zaposlenika (osim direktora). Navedeno pravno lice ne posjeduje nepokretnu imovinu, niti novčana sredstva. Društvo posjeduje pokretnu imovinu – 29 mašina koje se vode u knjigama kao imovina stečajnog dužnika koje se fizički nalaze u Lukavici, a pored navedenog posjeduje kamere i kancelarijski materijal. Takođe, u izvještaju je navedene još 10 mašina koje su zatečene u prostorijama koje je koristio stečajni dužnik, ali koje nisu evidentirane u knjigama i koje su dužniku date na korištenje, ali nisu prodane niti je dužnik stekao vlasništvo na drugi način na istima. Takođe, evidentirano je potraživanje u iznosu od 17.406,55 KM, koje se odnosi na dužnika Berina Shoes d.o.o. Gračanica, proisteklo iz ugovora o prodaji zaključenog 2025. godine, iz kojeg je dužnik isplatio jednu ratu, a ostale nije. U izvještaju je navedeno da iz knjigovodstvenih evidencija i pribavljenih uvjerenja proizilazi da društvo ima obaveze u iznosu od 82.288,27 KM, koji se sastoji od obaveza prema dobavljačima u zemlji u iznosu od 52.394,45 KM, obaveze po osnovu plaća i naknada plaća 19.619,56 KM, obaveze po osnovu PDV 2.266,46 KM (prema UIO) te ostale obaveze u iznosu od 8.007,80 KM (uz napomenu da se u uvjerenju PU navodi da društvo ima obaveza u iznosu od 719,70 KM). Društvo ima četiri bankovna računa, od kojih su svi blokirani od 09.07.2025. godine.

Privremeni stečajni upravnik je dao mišljenje da dužnik posjeduje imovinu iz koje bi se mogli finansirati troškovi stečaja (mašine su 2025. godine procjenjene na iznos od 36.477,90 KM, te ima potraživanje u iznosu od 17.406,55 KM), da postoje razlozi i uslovi za otvaranje stečaja, da se poslovanje ne može nastaviti u cjelosti niti djelimično, da su na osnovu dostavljene knjigovodstvene dokumentacije i izvršenih neposrednih pregleda uočene značajne greške u sačinjavanju završnih fin. izvještaja u dijelu procjene vrijednosti imovine, te da je podnosilac blagovremeno podnio prijedlog za otvaranje stečaja (računi blokirani 09.07.2025. godine a prijedlog podnesen dana 05.05.2025. godine).

Na ročištu dana radi raspravljanja o izvještaju zastupnik dužnika, u bitnom nije imao primjedbi na izvještaj privremenog stečajnog upravnika.

Odredbom člana 102 stav 6 Zakona o stečaju je propisano da stečajni sudija otvara stečajni postupak nad imovinom stečajnog dužnika ako je prijedlog dopušten, ako postoji stečajni razlog i ako će imovina stečajnog dužnika prema predviđanju biti dovoljna da namiri troškove postupka.

Prvenstveno, u konkretnom slučaju, sud utvrđuje da je prijedlog za otvaranje stečajnog postupka dopušten, jer je podnesen od strane stečajnog dužnika, kao lica koje je ovlašteno da podnese prijedlog u smislu odredbe člana 6 stav 6 Zakona o stečaju.

Takođe, imajući u vidu da su računi dužnika blokirani od 09.07.2025. godine postoji platežna nesposobnost dužnika u smislu člana 6 stav 5 tačka 2 Zakona o stečaju, a koja predstavlja razlog za otvaranje stečaja u smislu člana 6 stav 2 tačka 1 istog zakona. Iz izvještaja privremenog stečajnog upravnika proizilazi da se iz imovine mogu pokriti troškovi otvaranja stečaja.

Slijedom navedenog, sud nalazi da su ispunjeni svi uslovi propisani odredbom člana 102 stav 6 Zakona o stečaju za otvaranje stečajnog postupka.

Odluku o imenovanju stečajnog upravnika, sud je donio temeljem odredbe člana 104 stav 2 tačka b Zakona o stečaju, a nakon što je utvrdio da isti ispunjava uslove utvrđene odredbom člana 71 Zakona o stečaju, uz obavezu stečajnog upravnika da bez odlaganja dostavi izjavu stečajnom sudu da nema smetnji za njegovo imenovanje smislu člana 76 Zakona o stečaju, a što je propisano članom 78 stav 3 tačka i) istog zakona. Sud napominje da je privremeni stečajni upravnik podnio molbu da sud imenuje nekog drugog kao stečajnog upravnika, zbog nemogućnosti preuzimanja dužnosti zbog redovnih obaveza.

Sud je odluku o određivanju ročišta za ispitivanje prijavljenih potraživanja i izvještajnog ročišta, donio temeljem člana 106 Zakona o stečaju.

Odluku o objavljivanju otvaranja stečajnog postupka, sud je donio temeljem člana 105. stav 1. Zakona o stečaju.

Temeljem odredbe člana 105. Zakona o stečaju, sud je uputio odgovarajuće pozive povjeriocima i dužnicima stečajnog dužnika.

Upis otvaranja stečajnog postupka u javne registre određen je temeljem odredbe člana 108 stav 1 tačka a Zakona o stečaju.

STEČAJNI SUDIJA
Vedran Milašinović

POUKA O PRAVNOM LIJEKU:

Protiv ovog rješenja je dozvoljeno izjaviti žalbu, u roku od osam dana od dostavljanja, koja se podnosi Kantonalnom sudu u Tuzli, a putem Općinskog suda u Tuzli, u četiri primjerka. Žalba ne odlaže izvršenje rješenja (član 109 Zakona o stečaju).